



**Komunikadu Imprensa**  
**26 Feveiru 2021**  
**Parlamentu Nasionál**

**Parlamentu Nasionál aprova proposta ba rejime jurídiku arbitrajen voluntaria hodi halo alterasaun ba Kódigu Prosesu Sivíl**

Iha 22 Feveiru 2021 liuhusi reuniaun plenária, Parlamentu Nasionál halo votasaun finál globál ba Proposta Lei Nú.11/V(2)) kona-ba Rejime Jurídiku Arbitrajen Voluntária hodi halo alterasaun ba kódigu Prosesu Sivíl. Votasaun iha finál globál hetan votu afavór 36, kontra 6 no abstensaun 5 husi totál deputadu prezente hamutuk na'in 47.

Diskusaun ba lei ne'e iha rekursu husi proponente deputadu Francisco Vasconcelos liga ho kazu sivíl barak ne'ebé pendente iha Tribunál ho nia kompleksidade ne'ebé presiza tempu atu rezolve, ho nune'e iha proposta ne'e husu atu mantein ho proposta hosi Governu.

Artigu ne'ebé husu atu halo alterasaun mak hanesan artigu 56 kona-ba prosesu arbitrajen, ne'e fila ba fulan 12. Proposta alterasaun ne'e aprova ho votu afavór 29, kontra 0 no abstensaun 0.

“JSMP apresia ho serbisu Komisaun A hodi finaliza lei ne'e lalais ho diskusaun no aprovasaun hodi apresenta ba Meja Parlamentu Nasionál hodi halo diskusaun no aprovasaun fali iha finál global. Hein katak ho lei ida ne'e bele responde ba preokupasaun públiku nian kona ba kazu sivíl sira, liuliu kazu disputa komersiál ne'ebé mak durante ne'e pendente hela iha Tribunál. Importante mós atu Governu kria kondisaun no prepara rekursu umanu ne'ebé adekuaudu no kualifikadu atu implementa lei ne'e ho di'ak,” dehan Diretora ezekutiva JSMP Ana Paula Marçal.

JSMP mós apresia ho iniciativa Komisaun A iha prosesu diskusaun ba lei ne'e ne'ebé sempre envolve mós entidade relevante sira liu-liu JSMP iha audénsia públiku antes tama ba diskusaun especialidade. Hein katak Komisaun Especializada Permanente sira iha PN partikularmente Komisaun A kontinua uza mekanizmu ida ne'e hodi enkoraja públiku atu partisipa iha prosesu lejislasaun.

Atu hetan informasaun liutan favor kontaktu direitamente:

Ana Paula Marçal  
Diretora Ezekutiva JSMP  
Telefone: 3323883  
[www.jsmp.tl](http://www.jsmp.tl)